

**Mariano Soler Sanclemente**  
**(Gandía, 1816 – Zaragoza, 1889)**

O suyo pai, capitán d'Infantería, yera d'Ayerbe, como os suyos lolos paternos, y a suya mai, de Pastriz. En 1862 se casó con a suya sobrina Teodora Erruz Otto, natural de Balbastro y, como él, perteneixén a una familia infanzona.

Rezibió o grau de lizenziáu en Leis en a Universidat de Madrid en 1839 y lo de doctor, en 1843. En ista ziudat, treballó en distintos puestos, en primeras, en l'Academia Matritense de Jurisprudencia y Legislación, y, dimpués, en o Ministerio de Gracia y Justixia dica 1867. Ixe año estió nombrau presidén de Sala de l'Audiencia de Pamplona, por un breu periodo de tiempo, ya que estió declarau zesán dica a suya chubilación en 1880. Dinantes, en l'año 1866, eba rezibito a Orden de Carlos III.

Mientras treballó en l'Academia Matritense de Jurisprudencia y Legislación, Mariano Soler ocupó os cargos de revisor y zensor por o luzimiento d'os suyos exerzizios literarios. Por ixo no ye d'extrañar que os suyos paisanos d'Ayerbe, le encargasen a redazón d'a pastorada d'Ayerbe, nombrada “Décimas de los danzantes para la inauguración de la Iglesia de Ayerbe en el año 1855”. Estió redautada con motivo y a fiesta d'a devantadera de l'autual parroquia que tenió lugar os días 11 y 12 d'abril de dito año. Escrita parzialmén en aragonés, pareixe que en l'uso d'ista luenga contó con l'aduya d'un familiar d'Ayerbe, Manuel Soler, Ye estada estudiada por Francho Nagore y Chesús Á. Giménez.

<http://www.lenguasdearagon.org/wp-content/uploads/2016/06/Recosiros10mayo.pdf>